



Cuira

La frestgera publica da «**Madame Frigo**» salva mangiativas

Cumprà en memia bler mangiativas, ina frestgera plaina avant las vacanzas u restanzas dad ina festa gronda – per quests cas porschan las frestgeras publicas da l'organisaziun «**Madame Frigo**» ina pussaivladad da dar vinavant il mangiar danvanz ad insatgi auter empè da bittar davent.

2024-02-29, Maria Vieli

Mintgina e mintgin po deponer u prender ora mangiativas da las frestgeras publicas da «**Madame Frigo**». Quellas vegnan tgiradas da voluntaris, ed i dat en il fratemp passa 130 frestgeras publicas en l'entira Svizra. Uschia vegnan mintg'onn salvadas passa 200 tonnas mangiativas dal sfarlattim. Sper in lieu a Schiers, datti en la regiun dal Grischun dapi passa in onn er ina frestgera da «**Madame Frigo**» a Cuira.

La stgaffa melna cun l'inscripziun «**Madame Frigo**» stat a Cuira gist sper ina chasa a la Planaterrastrasse 11, ed en questa stgaffa sa chatta ina frestgera ch'è adina accessibla. Avant var in onn ha Livia Tanner manà questa purschida ensemen cun ulteriurs voluntaris a Cuira. A l'entschatta era la frestgera en il territori da Cuira Vest. Ma cunquai che questa regiun era pauc frequentada, ha il team da voluntaris midà l'ultima stad la piazza da la frestgera en la pli populada citad veglia. Tras quai datti ussa in barat pli stedi da mangiativas en la frestgera. Ed i na resta era strusch insatge da mangiar danvanz, che vegniss lura mal e stuess vegnir dismiss dals voluntaris. Entant s'occupan sis voluntaris cun la tgira da la frestgera. Latiers tutga da nettegiar ella, e da controllar ses cuntegn sin mangiativas betg lubidas.

Tge è lubi tar «**Madame Frigo**»?

En la frestgera publica pon ins deponer:

fritgs

legums

rauba da pasta (paun etc.)

bavrondas betg alcoholicas

tuttas vivondas betg avertas che n'han betg surpassà la data da consum

Betg lubi è:

charn

pesch

pulom

bavrondas alcoholicas

vivondas gia cuschinadas (per exempel rests)

Ils voluntaris a Cuira collavuran dapi curt cun l'organisaziun per salvar mangiativas Maisa magica (Tischlein deck dich), che rimna victualias che na pon betg pli vegnir vendidas e che repartan quellas a persunas pertutgadas da povradad. Ina pitschna part da quellas mangiativas vegn ussa era deponida en la frestgera da «**Madame Frigo**» a

Cuira. Uschia daventia lur purschida pli attractiva per visitaders e visitadras, ed **ultra** da quai vegnia gidà anc dapli a salvar victualias. Er èn ils organisaturs il mument a la tschertga d'in fin dus lieus per ulteriuras frestgeras a Cuira, per pudair porscher uschia anc dapli pussaivladads da parter victualias, empè da bittar ellas davent.



Livia Tanner empenescha la frestgera cun mangiativas che derivan da la Maisa magica.



La frestgera gist controllada ed emplenida è pronta per ses proxims visitaders.